

# Afdlin nafi salah laku perolehan projek DBKL RM4j

**Pelakon** dan pengarah, Datuk Afdlin Shauki menafikan dakwaan salah laku dalam perolehan projek di bawah Dewan Bandaraya Kuala Lumpur (DBKL).

Afdlin berkata, isu dimainkan adalah agenda yang sengaja dilakukan untuk memburukkan namanya.

“Baru-baru ini, tular hantaran dalam Telegram yang cuba mengaitkan saya dengan tuduhan salah laku dalam perolehan satu projek di bawah naungan Datuk Bandar Kuala Lumpur.

“Saya menafikan sekeras-kerasnya terdapat apa-apa unsur salah laku dalam perolehan projek ini.

“Ini adalah usaha oleh pihak tidak bertanggungjawab untuk memburukkan nama saya.

“Agenda pihak ini hanya didorong oleh perasaan hasad dengki dan dendam tidak bertempat,” kata Afdlin dalam hantaran di Instagram.

Afdlin berkata, dia sudah membuat

laporan polis semalam terhadap fitnah yang dilemparkan terhadapnya bagi membolehkan siasatan dijalankan.

“Saya difahamkan, perkara ini juga sedang disiasat secara dalaman oleh DBKL. Oleh itu, saya memberi ruang kepada pihak yang berwajib untuk melaksanakan tanggungjawab mereka,” katanya.

## **Buat laporan polis**

Afdlin juga bersedia memberi kerjasama penuh kepada mana-mana agensi penguat kuasa berhubung siasatan dakwaan salah laku membabitkannya.

“Fitnah dan tohmahan berniat jahat ini tidak seharusnya dibiarkan berleluasa. Saya pasti dengan izin Allah akhirnya kebenaran akan tersuluh dan keadilan akan ditegakkan,” katanya.

Kelmarin, media melaporkan DBKL melancarkan siasatan dalaman berhubung dakwaan salah laku seorang

ahli lembaga penasihat yang dikaitkan dengan pemberian projek bernilai RM4 juta.

Datuk Bandar Kuala Lumpur, Datuk Seri Maimunah Mohd Sharif dilaporkan mengesahkan siasatan itu dan pihaknya sedang bekerjasama rapat dengan Unit Integriti DBKL.

Dakwaan salah laku membabitkan ahli lembaga penasihat itu mula tular di media sosial sejak kelmarin.

Ia membabitkan pelanggaran proses tadbir urus berkaitan perolehan projek kerja penerbitan bahan kreatif untuk DBKL bernilai RM4 juta yang didakwa tidak diberikan melalui tender terbuka.

